



祀宣聖廟記

至元二十有一年皇帝念齊魯未平特命中書平章政事知河南山東等處行樞密院事兼陝西諸道行御史臺御史中丞察罕帖木爾往平之公祗服明命大會諸將于洛陽蒐軍實閱武備發秦晉河洛兵渡孟津踰太行出井陘口旌旗千里鼓行東下粵六月辛卯躬帥鐵騎建大將旗鼓以進七月至冠州河西降次東昌揚誠以金城獻八月渡鹽河分遣裨將帥偏師搗東平與東平賊遇河東兩戰大破之伏尸四十里斬首二萬級直造城下

渠寇田豐降傳檄郡邑不旬日悉定魯地公曰東
魯爲禮義絃誦鄉闕里宣聖廟所在由兵興墟荆
棘民魑魅族人士大夫逃難解散四方祀典廢弛
將數年今境土廓清宜嚴脩祀事以示斯民勸遂
卜剛辰遣都事尹師彥奉太牢青酒祀聖人於曲
阜闕里使者將命詣殿庭設俎豆簠簋具三獻禮
一如舊式里中父老扶杖圍門墻而觀者如擲咸
舉手加額曰不圖今日復見聖朝威儀皆感泣數
行下使者歸復命公喜曰吾幼而敦詩書說禮樂
長而行所知遵所聞至于今日奉天子詔提王者

命斯聖人之教也其脩祀典固宜於是
二十一年十月日蘭陽孫耆翁爲之記

尼山孔子像記

設像事神非古也其尸禮既廢之後乎漢文翁立
學官成都蜀有文翁石室設孔子坐像其坐斂蹠
向後屈膝當前上古以來君臣及七十二弟子繪
事兩旁晉王右軍嘗簡蜀守宮做之有宋嘉祐中
王公素慕爲禮殿圖此像之最古者然皆漢衣冠
也居敬學制鄒邑遷學舍于城西建孔子廟時孔
顏孟三氏子孫教授張頴習于禮者也因問立像

之制曰古人席地而坐高臺隆辰既已失之冕服
之度傳說甚矣關里行教像顏子從後者顧愷之
筆杏壇小影像吳道子筆及近司冠像皆漢晉衣
冠耳禮記儒行篇孔子自言少君魯衣逢掖之衣
長居宋冠章甫之冠此孔子衣冠也縫掖深衣是
已章甫玄冠是已深衣以布身二幅各四尺四寸
袂二幅亦四尺四寸殺其袂而圓至袪為尺有二
寸不殊裳其裳十二幅兩傍殺之領緣袪皆緇束
以革帶左右佩有殺無鞞加以大帶紐約用組黑
屨於是做文翁石室作五像章甫縫掖危坐謂孔

子毓秀尼山奉而居之坤靈洞乃問冕之制則曰
散在禮經注疏雖互有得失衆而求之可以考見
顧讀者不之究耳古者冕服有等大要冕弁冠三
者而已曰冕者大古謂之緇布冠加絛緹縹紱則
後王之彌飾也其冠古以布而緇之周以純其下
爲武謂圍首者武上有冠以緇爲之屈加於武內
畢有襞積尚左或十二或九或七或五或三武貫
以衡衡之兩旁有纊纊繫以瑱懸以紕冠之上加
覆謂之緹緹旁有紐貫之於衡前後垂縹紱加冠
襞積之數紱以玉十二者五玉玄黃朱白蒼貫以

五采繅如玉之色九旒七旒三玉朱白蒼三采五旒三旒二玉朱綠二采繅如玉之色固以紘紘繅於衡之左端加之緹上復繅於衡之右端繞於頤下再繅而結之結者謂之纓垂者謂之綷紘天子朱卿大夫青士緇而加以采次者弁以皮韋皆有會會謂縫飾會以玉如冕旒之數會之內以象爲之卹無襷積貫武以筭統繡璵纓皆冕之制次者冠玄冠是也委貌章甫其名雖殊其制相類如緇布綷等衰如弁之制此其首服也古人衣身皆中尺四寸天子長袂袂八尺八寸公侯侈袂袂六尺

六寸服冕者衣以絲其色玄冕十二旒者衣十二章日月星辰山龍華蟲作繪宗彝藻火粉米黼黻絺繡華蟲以上在衣宗彝以下在裳日在左月在右星辰宜畫北極在北山之性止而靜龍布升降華蟲雉也宗彝二其一畫虎其一畫蛇如猴形以尾卷物內鼻中火之性圜而不銳白與黑謂之黼如斧形黑與青謂之黻如兩已相背九章去日月星辰而登龍於山龍有降無升登藻於衣七章自華蟲以下登火五章藻火粉米在衣裳黼黻三章衣唯粉米而裳黼黻七幅前三後四兩旁無殺

縫其色纁束以革帶帶之前垂鞞鞞如裳之色紕以爵韋紕謂兩遍紕以素純謂下緣十二章飾以龍九章火七章山五章三章無飾左右佩玉有珩璜琚瑀衝牙貫以蠙珠籍以綬綬有等上加大帶帶以素十二章朱裏終辟首卑九章素帶終卑七章五章素帶辟垂三章率下辟帶紐約用組赤烏服弁者祭服以緇謂之紂衣裳帶鞞佩綬如冕之制朝服以布天子則素積祭服朝服長袂侈袂如冕而服弁者通服玄端焉端身四尺四寸袂亦四尺四寸故有端之名冠服則玄端上士玄裳中士

黃裳下士雜裳前玄後黃曰雜有鞞如裳之色帶佩有等黑履玄冠深衣可也主薦之而已既薦則兵首非若後世執笏然笏則摺於帶間亦不執也執笏自後周始非古也既又作子思像于中庸精舍孟子像于孟子墓廬以鄒魯聖人之居四方於此觀禮故刻之尼山以候好禮者有取焉至元三十一年壬申日南至從仕郎鄒縣尹兼管本縣諸軍與魯兼勸農事東陽司居敬記

重建至聖文宣王廟碑

聖上嗣服之初祇述祖考之成訓興學養士嚴祀

先聖自曲阜始制詔若曰孔子之道垂憲萬世有
國家者所當崇奉中外聞之咸曰大哉王言拭目
太平文明之治粵明年元貞改元先聖五十三代
孫密州尹治入朝璽書錫命中議大夫襲封衍聖
公月俸百千秩視四品孔氏世爵弗傳者又至是
乃復申命有司制考辟雍作廟於京師由是四方
嚮風崇建廟學惟恐居後朝里祠宇燬於金季之
亂閣號奎文若大中門闈存者無幾右轄嚴公忠
濟保魯嘗假寺順曆錢佐營繕之費歲戊申始
復鄆國後寢聖順孟十哲像至元丁卯衍

聖公治尹曲阜主祀事將圖起廢奎文杏壇齋廟
黌舍即其舊而新之禮殿則未遑也國初封建宗
室畫濟充單三州爲魯國大長公主駙馬濟寧王
分地置濟寧總管府屬縣十六曲阜其一也濟寧
守臣按檀不華恭承認旨會府尹僚佐鄉長者謀
曰方今聖天子守成尚文此鄉風化之源禮義之
所從出爲守臣者敢不對揚休命以廟役爲任首
出帛幣萬緡衆翕然助之傭工顧力市木於河輦
石於山掄材於野未棟榱桷楹礎之屬悉具又得
泗水渠堰積石數百石堊稱是露階鉛砌咸足用

馬郡政之暇躬爲督視甄陶鍛冶丹腹髹漆以至
工師廩積各有司存經始於大德二年之春爲歲
侵中止歲事於五年之秋不期月而告成殿轟重
簷亢以層基繚以脩廊大成有門配侑諸賢有所
泗沂二公有位黼座既遷更塑鄆國像於後寢締
構堅貞規模壯麗大小以楹計者百二十有六費
用以緡計者十萬有奇落成之日遠近助祭者衣
冠輻輳衆庶瞻顛千禩祖庭頓還舊觀於是衍聖
公治遣其子曲阜令思誠奉表以聞且以廟碑爲
請會博選胄子入學擢思誠國子監丞特勅中書

賜田五千畝以供粢盛復戶二十八以應洒掃仍
下翰林書其事于石臣復承命踧踖既述興造始
未竊惟聖人之道與天地同聖人之祀與天地無
極堯舜湯文之君不作而道在洙泗立言垂教推
明堯舜湯文致治之由模範百王仁及天下後世
願治之主莫不宗之廟貌相望達于四海聖人之
道固無係於祀禮之隆殺夫尊其道而忘其祀蓋
治古之恒規王政之所先也洪惟聖元神武造邦
天兵傳汴戎事方殷不忘存敬先聖之祀詔求五
卜一代衍聖公元措歸魯哀集太常禮樂於兵燼

之餘燕翼之謀肇於此矣世祖聖德神功文武皇帝仁露義洽九域混同文物煥然可觀內立國學外置郡邑學官而於先聖之後尤所注意遴選師儒訓迪作成需賢以嗣封爵茲志未究皇上續而成之故自紹膺景命以敦化勵俗爲先務至於博施濟衆敷文來遠哀矜庶獄惠鮮鰥寡由天縱之聖見於設施皆堯舜湯文之舉揆諸聖經之書若合符契用能張皇教本光昭先業以致魯國巨民思樂泮水如附靈臺子來之衆至矣哉觀文化下必世後仁之效豈特振曜一時定宗社無疆之福

也銘曰

道之大原寔出於天天何言哉乃以聖傳傳道維何唐虞三代儀範百王萬世永賴聖人之功與天比隆聖人之祀垂之無窮皇元肇基撥亂右武天兵趨汴周禮在魯烝哉世皇載整乾綱始定終綏遠臣萬方肅肅魯庭嗣封有典德音孔昭聖謨不顯王者之作必世後仁繼序不忘成於孝孫適觀厥成是訓是則思樂泮水作廟翼翼如矢斯棘如翬斯飛邊豆靜嘉陟降有儀祀事孔嚴世爵以延洒掃有戶衆盛有田聖政聿新希蹤治古僉曰皇

明登三咸五泰山巖巖聖祀綿綿與國無疆於萬
斯年

勅翰林學士承旨正奉大夫知制誥兼脩國史臣
閻復撰

闕里宅廟落成後碑

玄聖之德大如天地昭如日月蕩蕩乎無能名焉
皜皜乎不可尚已歷代有國之君崇尚其教廟而
祀之幾徧天下闕里聖人鄉邑自漢祖過魯祀以
太牢由是以降其廟制因仍損益見於圖志可考
者在宋金爲最盛貞祐一燬久而未復我元列聖

尊道勸學之心未嘗末切特以志在混一徃於金
革有所未暇逮大德守成始克成二祖三宗之盛
意毀而廡之位而像之沈沈奕奕有恤有嚴數百
年間規偉觀一旦而復視舊益加怪焉而又紹衍
聖世享之封主四仲家庭之祀無以供采盛也則
昨之士無以給涓潔也則復其戶瑩林則樵採有
禁子孫則教道有師詔旨諄復訓諭切至且命翰
林書之石猗歟偉哉初太中大夫監萊濟寧路總
管府事按檀不華以魯居治境乃懿戚封邑祗奉
朝廷德意開諭僚屬勉勗士庶先已而爲之倡前

役而爲之備國無費財民不知勞卒成一代之盛
事總管馬嘉議昫寶左右之既卒役狀其本末遣
經歷張格知兗州馬奉訓禧請記其成稿嘗一拜
林廟伏讀漢隸數碑見其請立百戶卒史典頒禮
器及用辟雍禮出王家錢給大酒直則乙瑛也選
試孔龢補卒史則後相平也韓勅則脩飾宅廟造
立禮器孔晨則乞依社稷出王家穀以供春秋禮
祀是數人者皆東都前後魯相以所請上之三公
府公府以聞乃可其請事皆魯相發之數人者名
不著見於史徒以上章爲聖廟有所陳請勒名貞

石闕世千數百年至于今不朽矧太中生當盛代
遵奉明詔振舉隆典潤色太平茲特隆化美俗勇
於爲善之一端耳若其表率一道廉勤奉公恤隱
除害善政及民者尚多自當載名信史傳休無窮
豈東都魯相所可並日而談哉

大德十一年冬十月東平晚進李謙拜手書

手植檜刻像記

天地否而復泰日月晦而復明聖人之道厄而復
亨六籍厄於秦至漢而復興正道厄於晉宋齊梁
陳隋之間至唐而復興此自然之理也貞祐初虜

冠犯曲阜焚孔庭檜聖道之廢興固不係於一木
之存亡新宮火三日哭重先祖之居也况聖師之
手植乎衍聖公收其煨燼之餘率侯刻而像之知
尊事矣若夫茂其德封而植之是聖道常在也豈
特一木哉

正大三年六月晦趙秉文謹記

祭孔子廟碑

延祐庚申之春聖天子初登大寶肇脩禮類遣說
書王存義詣魯以太牢祀孔子手香加額以授之
命中書齎白金百五十兩錦綺雜絲表裏五十二

端翰林撰祝文三事禮部檄濟寧路如式供具以

太中大夫濟

寧路

總管白珍率其屬

與有司羅儀衛

清道肅迓諸儒禮服前導士民觀者溢郭塞衢五

月甲申至曲阜越三日丁亥存義若濟寧路總管

珍孔子五十四世孫襲封衍聖公思晦恪行祀事

禮三獻儀物交至神人以和翼日丕集孔顏孟

子孫以享神饗盡文衍如也前是方以亢旱爲憂

迨旦_五甫陳甘雨沛作誠者謂皇上誠敬所致欽

惟聖天子嗣體守文於齊政之初爰稽祀典以孔

子爲天下先於是中外忻忻以爲繼今以往我國

家聲教之敷文物之興可想見其愈盛矣猗歟偉哉古帝王之祀孔子者自漢高祖始然當時禮意未必若今日之備也今朝廷優禮孔族亦至矣復之世世無所與公其宗子以奉祀事官其族之賢者尹曲阜以治之推其尊者為家長以領家務勅名儒以教授其子孫擢其秀異者不次而爵祿之嗚呼孔族之蒙天子恩如此可不思所以圖報哉存義字之宜純謹六雅於將敬為尤稱珍字寶臣愷悌君子也間者數為元用言孔廟之祀亦昭代令典也請文諸珉以垂不朽元用辭弗獲命遂為

紀其實而系之以詩曰

於穆天皇思隆至治孔道是崇首嚴祀事發使來享恭敬之將金帛交錯有飭其芳儀備而恪耿其煌煌誠格神佑風動四方大哉夫子億代所尊屈干衰周伸于我元列聖相承益脩文德穆穆當天明明在職聲教誕敷惟道是則於萬斯年會其有極

朝散大夫尚書省右司員外郎曹元用撰

代祀闕里孔子廟碑

皇帝嗣大歷服命翰林臣元用捧白金百五十兩

幣帛二十有六純祭闕里孔子廟祀畢嘉議大夫
襲封衍聖公思晦奉直大夫濟寧路判官董昭請
文諸貞珉以紀昭代盛事元用竊謂孔子之教非
帝王之政不能及遠帝王之政非孔子之教不能
善俗教不能及遠無損於道政不能善俗必危其
國由漢以來有天下者消禍亂於未萌寧邦家於
悠久以孔子仁義綱常之訓浹於人心忠孝迭發
默有以相之也是故歷代所以崇奉其教者至漢
魏爲孔子廟置百戶卒史掌禮器出王家錢以祭
既又給戶錫田公侯其宗子以主祀事至唐開元

則袞冕而王之令天下州縣皆立學漢高帝明帝
章帝宋真宗皆親至其廟極誠敬以行薦裸禮真
知所本哉若始皇非先聖燔詩書恣行暴虐適足
以速其滅亡而已皇元以馬上定天下國初即誕
敷文教遣使函香詣曲阜祀孔子給酒掃戶百令
襲封衍聖公仍其舊歲割山東諸郡曆日銀以葺
廟宇詔天下取法孔子興學作人武宗皇帝登極
肇遣詞臣函香如國初故事仍齎銀幣以將其意
厥後列聖相承踵以爲則欽惟皇上以聰明文武
之資中興大業闡人文以化天下今者闕里之祀

亦所以丕承先志也元用以天曆二年三月甲申
將命至充衍聖公率孔顏孟三氏若諸生郊迓董
濟寧暨厥僚屬具義衛前導至祀所越三日丁亥
齋沐備三獻禮薦裸如係祝史致告諸執事欲擗
其職牲腊酒冽神人胥懌既乃大享與祭者於廟
之東廳霽澤汪濊恩意普洽咸極歡而罷嗚呼自
昔帝王致崇極於孔子者多矣然皆未若我朝之
盛天子即位之初輒遣官致祭儀物文臻夙與他
祠異皇乎休哉此亘古所未有也所尚如是其能
化行俗美措四海於隆平延弘祚於萬斯年也宜

矣元用遂從衍聖公之請謹系以詩曰

惟皇斯赫聖德中興易亂以正丕祚是承文命誕
舉咸秩百神首及尼父金幣輝輝粵自天至多士
駿奔竭虔以祀庶羞惟精有苾其馨樂舞充庭允
和且寧神兮洋洋儼在其上具曰來享與情交暢
孔道在人惟萬世則克式克遵寔康家國是背是
棄禍乃遠躬吉凶之捷影響惟從聖哉天皇克崇
其教風動多方胥勸胥效文治熠興羗由茲始請
勒臣詩永昭德美

天曆二年四月吉日翰林侍講學士通奉大夫知

制誥同脩國史兼經筵官曹元用撰

重修宣聖廟題名記

聖天子即位加意儒術以風化天下首以闕里宣
聖廟歲久將壞勅濟寧路出官錢五萬二千餘緡
為脩葺之資省部檄總管徐亞中暨經歷王承事
董其役二公奉行惟謹至則先祭而後治其事入
以為有禮焉既而相與周視計度然後庀工掄材
指授區畫莫不有法比還治則又以監兗州忙古
歹暨曲阜縣道僧孫尹孔思凱分任其事主簿王
文中實左右之上下有承而人用勸未幾繕葺者

完缺傾者起腐敗者堅漉漫者飾煥然一復舊觀
若二公者可謂祇承朝廷之德意也惟夫子以神
道設教有天下國家者咸取以為法歷代崇奉未
有若國家尊尚之至邇者衍聖公請依前代故事
起圍牆四隅建樓做王公之制奎章閣以聞天子
允焉省部以徐公勤敏復檄公監督功之成可指
日而待將有大書深刻頌其美於無窮者而此特
紀其事之一端耳夫紀事尚實不尚文故略其文
而直書焉

至順三年五月吉日孔顏孟三氏子孫教授張瀚

記

勅賜曲阜孔廟田宅之記

元統元年十二月二十五日御史中丞臣亦憐真
班臣祖常治書侍御史臣普化言於上曰臣等及
御史大夫臣脫別台臣唐其勢議江南行臺按問
江西僉事任忙古台以墨坐沒入其私田八頃八
十九畝屋二十有七間家奴若干人在鄆境者實
通曲阜孔子林廟方今聖天子師法孔子設經筵
崇儒術我御史臺以興學宣化爲職事顧孔廟歲
入視前代猶儉春秋釋奠師生餼廩時或不給請

以今歲入產何孔氏襲封世業之其家奴俾備於
有司若所沒入居田所沒入田世服役孔氏爲酒
掃戶而輸其租制可明日臣唐其勢又自帥其同
列臣亦憐真班臣祖常臣普化等導意於內侍臣
禿滿迭爾以啓皇太后于宮中出諭旨曰善一如
皇帝制行之於是所司以產歸孔氏明年孔氏具
牘來屬玄文諸石仰惟皇元初得宋金郡邑校官
田產無筭悉以供其祭祀食其師生繕脩其廟學
其校官無田則以縣官緡錢充其用無禁有司不
奉命則御史部使者察之其爲尊崇孔聖之道非

獨今日蓋嘗考之郢人書社七百里之事有無不
必知尼谿之田齊遂以封一變而至魯哉此於世
道有關聖人無與也今上富於春秋政事參決東
朝居今之臣能言附益孔氏者皆引君當道之事
也臺臣首陳經筵次表儒術豈有他哉兩宮俞音
聖志一揆兆足行矣漢初六經甫脫羸難高祖過
魯之祀天下駸駸然望斯文之治史乃稱文景不
右儒術以竇后故咎豈在是哉灌絳東陽侯之屬
有一人者如今臺臣謀豈必金石絲竹之音作而
後不壞孔子宅以書還孔之邪漢之諸臣功烈卑

矣玄故著之使來者知臺臣之意在是是議也侍
御史臣朶列捍治書侍御史臣彝咸攸成之奏之
日經歷臣禿滿都事臣張正李實從

元統二年 月 日中順大夫僉太常禮儀院事
臣歐陽玄記

代祀闕里孔子廟碑

聖天子嗣登大寶當至元乙亥之初命翰林臣思
誠奉祝文函香詣曲阜以太牢代祀孔子廟從集
賢請遵舊典也思誠將命以閏十二月壬辰抵兗
州預敕有司蠲日尤事乙未濟寧路守土臣張仲

仁兗州判劉彬暨曲阜縣尹宣聖五十五代孫克
欽孔顏孟三氏子孫教授趙惟賢率聖族清道肅
儀朝服郊御魯諸生儒服前導齊于祀所翼日質
明恪行祀事思誠若仲仁若彬咸服法服攝三獻
官克欽若惟賢等咸服朝服司分奠諸生駿奔走
各虔乃職牲醑酒冽禮備樂龠祝史致詞洋洋乎
神明之格而歆也竣事之旦大享神餼于燕申堂
聖族陪位與祭者咸在少長齒坐迭起行酒其敘
秩如股翼均隸亦既醉記其樂衍如燕畢仲仁等
請曰代祀有記所以紀昭代之盛典不可闕也竊

惟自漢以來崇奉先聖至我朝而極盛加號大成
改封聖考爲啓聖王聖妣若聖妻並爲王夫人遣
使奉送制命于闕里祭以太牢其禮隆矣入皇太
后尋亦遣使奉薶幣致祭並刻諸石矧茲盛禮可
無紀乎思誠謹述其事之本末系以詩其詩曰
有皇聖元奄有萬方列聖相承文教誕揚皇明嗣
服繼叙不忘眷言曲阜素王之鄉爰命詞臣用祝
函籒載臨闕里爛其煌煌蠲辰歲事惟言惟良牲
牢肥腓黍稷芬芳禮備樂龠神人悅康於赫尼父
軌範百王允迪允嗣宗社隆昌或奠或背九有以

亡穆穆天子茲率厥常盛禮斯舉敬誠是將既欽
既敷惠澤其滂矢詩頌美億載休光

翰林脩撰承直郎同知制誥兼國史院編脩官臣
王思誠撰

創建洙泗書院記

至元後戊寅八月益都路宣慰東野潛社稷署令
蔡思中簿鄧昌壽偕五十三代孫文學孔澈具篚
幣詣元隆曰世尹聖裔也以斯道之故聘子從游
也又謂洙泗故基爲民所有化爲禾黍過者興嘆
出貲市田貿材經營量度禮敦講堂門廡齋庖閱

時告成將勒諸石以紀歲月特徵文於子子母多
讓元隆筆力孱弱辭不獲命遂記之夫天地之運
有通復日月之明有晝夜聖人之道有否泰非聖
天子則聖人之道不行微吾夫子則帝王之道不
明欽惟世祖皇帝平定區宇列聖祖武斯道之大
明以行焉廼詔天下郡縣廟祀夫子備王者禮樂
惟祖庭爲盛洙泗遺址斯文所基歷代未復荒頓
幾三千載矣一旦舉之實我皇元闡文運隆治化
之盛典也昔祖聖之講誨于是也刪詩訂書贊易
道脩春秋道統之傳以祖述憲章上律下襲皆鈞

覆載之體寒暑之時服食大坳三綱五常賴以不
隆而禮樂教化以之而可度典章文物以之而可
興脩已治人之德以之而可成洪纖高下各遂其
性形容夫性與天道之妙以相接受成就後學施
諸永世傳諸方冊爲天地立心爲生民立命爲萬
世開太平奚止土木之功爲哉然尹之區區者豈
特其繼述之孝將以資國家典禮之至尊崇斯道
之極誠臣子之至願也庸思其先自有國之初其
祖元用率孔族招庶姓以降尋以軍功歿於王事
之全暨治孳功祖庭其父思誠拜師命於成均四

君子者奕世象賢皆不暇及今能之匪尹之所能
爲也天也天朝文明聖治之化被四表格上下洽
之無窮故千古廢墜一時告新我朝所以冠五帝
冕三王之盛者於是乎在方其經始僉肅政廉訪
司事楊文書訥按部至說以予之尹之爲力也易
尹名克欽字敬夫考之世譜宣聖五十五代孫也
謹記

御賜尚醞釋奠記

至元五年後已卯正月皇帝田于柳林以上丁在
適允御史臺奏因宣聖五十四代孫監察御史臣

思立出上尊酒釋奠于廟里遣御史從事臣高元
肅駟政之禮竟曲阜縣尹權祀事臣孔克欽言于
宗黨曰茲誠希有之盛典不識諸石罔以昭後于
是其宗人前湖廣行中書省都事臣思迪等屬臣
宜記之宜延祐初科進士且嘗助教國子掄揚聖
德職也遂不敢辭而諾之曰吾夫子在魯哀公雖
誅之而未極其尊漢高帝雖祀之而未盡其禮後
代褒崇封爵之未悉其道詎若皇元累頒明詔既
於至聖文宣王上加封以大成復於二丁永享以
太牢重以香帛白金之飭帝心再三寅奉尊隆禮

意博邁越古昔遠矣今憲臺擴弘樽典需光祿
之天釀以備祖庭裡酌豈惟孔氏子孫有光實天
下儒服之士舉有光也廼拜手稽首樂爲之書
朝散大夫濟南路棣州尹兼管本州諸軍與魯勸
農事臣梁宜謹記

勅脩曲阜宣聖廟碑

今上皇帝臨御之七年歲在己卯春三月戊辰御
史大夫臣別里怯不花臣脫脫等言天曆二年十
月文宗皇帝在御奎章閣學士院臣沙臘班等列
奏曲阜宣聖廟自漢唐宋金凡有隳廢必奉勅繕

脩功成則勒之石衍聖公以舊廟將壞飭書奉圖
屬學士院以聞時文宗覽圖諭旨省臣趣脩之事
竣則立碑以詔方來今新廟既完而成績未紀懼
無以稱塞先詔御文章上臣等僉議請勅翰林侍
講學士臣玄爲文奎章閣學士院大學士臣夔夔
爲書前侍御史臣起巖爲篆以臺儲中統楮幣二
萬五千緡爲立石之貲制皆允迺命宣聖五十四
代孫御史思立傳勅臣玄俾書其事玄拜手稽首
言曰天佑下民作之君作之師昔者伏羲神農黃
帝堯舜禹湯文武敷聖人者作君師之道備於一

人用能左右上帝克綏厥猷吾夫子出天獨畀以
師道凡天叙天秩天命天討之事夫子明禮樂制
詩定書贊易道脩春秋而品節之以爲百王法於
後世儀封人曰天將以夫子爲木鐸子貢曰固天
縱之將聖夫子自論斯文之任上以屬於天下以
屬於已使得位設教即前數聖人所爲繼天立極
者也是故天欲興一代之治則吾夫子之道必大
昭明於時歷千萬世如出一轍皇元龍興朔方太
祖皇帝聖智天授經營四方太宗皇帝平金初年
歲在丁酉首詔孔元措襲封衍聖公復孔顏孟三

氏子孫世世無所與增給廟戶皆復其家是歲曆日銀諸路以其半益都東平以其全給脩宣聖廟尋詔元措括金人禮樂官師及前代典冊辭章鍾磬等器以數來上仍命於曲阜閱習禮樂以備時用又詔諸路設學遣官分道程試儒業世祖皇帝初在藩邸多是景從作其即位大召名儒開廣庠序命御史臺以勉勵校官國子監學以訓誨胃子大司農以興舉社學典文署以板行海內書籍提舉教授以主領外路儒生宿衛子弟咸遣入學輔弼大臣居多後又內庭獻納能明夫子之道者言

必稱旨 在位三十五年之間取士之法興學之條日討論之規模益弘遠矣 裕宗皇帝時在東宮贊成崇儒之美 成宗皇帝克繩祖武銳意文治踐祚之初詔曰孔子之道垂憲萬世有國家者所當崇奉既而作新國學增廣黌舍數百區胃子教養之法始備武宗皇帝媚興制作加號孔子爲大成至聖文宣王遣使闕里祀以太牢仁宗皇帝述世祖之事弘列聖之規尊五經黜百家登崇俊良以張治具我朝用儒於斯爲盛英宗皇帝鋪張鉅典廓開彌文明宗皇帝凝情經史愛禮儒士文宗皇帝

續熙聖學加號宣聖皇考爲啓聖王皇妣爲啓聖
王夫人改鑄衍聖公三品印章賜山東鹽運司歲
課及江西浙江兩省學田歲入中統楮幣三十一
萬四千四百緡界濟寧路裨脩曲阜廟庭文宗賓
天太皇太后有旨董其成功今上皇帝大續丕圖
儒學之詔方頒闕里之後鼎盛山東憲司洎濟寧
總管張仲仁曲阜縣尹孔克欽蒞事共恪以元統
一年四月十一日鳩工至元二年十月初吉落成
宮室之壯以寧神棲樓閣之崇以度寶訓周垣繚
廡重門層觀丹碧黝堊制侔王居申命詞臣揚厲

丕績於是內聖外王之道君治師教之誼大備於
今時猗歟盛哉皇元有國百餘年以來繕脩宣聖
廟者再丁酉之初以開同文之運天曆之際以彰
承平之風東冒日出西踰崑崙南盡火維北際冰
天聖道王化廣大悠久相爲無窮端本實在茲矣
臣玄奉命撰述有詔御文思立奉祝幣牲齊馳驛
往祭告厥成功臣玄既序顛末請系以詩詞曰
厥初生民倥侗顛蒙三五繼作大道爲公風氣日
開民習日漓道統絕續孰綱孰維少昊之墟東魯
之土挺生聖人以淑萬古聖人既生代天以言立

我民極與天並存惟皇建極尊用其道百王軌範
予以順考三光以全寒暑以平俊民用章時乃迓
衡天子垂拱大臣承弼體信達順鳳麟時出皇元
之興厚集大命太宗興文首法元聖世祖龍飛髦
士屬心恢弘文治濬發德音世及三紀仁漸義摩
建學立師善人用多溫文裕宗祇荷詒懋成廟崇
儒迪若天顯武皇英毅入繼離明載崇徽號玉振
金聲濬哲仁皇文德繼世誕揚祖訓籲俊尊帝爰
及英宗禮樂孔殷穆穆明考美德懿聞文宗續緒
聖聖克肖廼開奎府廼飭孔廟今上嗣世丕式大

猷勒石新廟宏貴鴻休新廟奕奕泰山具瞻衡統
統緹袞衣襜褕維宋維金遺刻具在於赫我元冠
冕百代我元聲教極彼堪輿鬻舍萬里誦詩讀書
惟茲曲阜斯道之壺如水有源如木有本皇監在
上執我道樞相我熙朝躋民唐虞瞻言臺臣職是
風紀昭宣獻謨是用歸美聖道王化如日麗天儒
臣詠歌億載萬年

至元己卯翰林侍講學士通奉大夫知制誥同脩
國史兼國子祭酒臣歐陽玄奉敕撰

尼山書院碑銘

周靈王二十年陬人顏氏禱於尼丘山二十有一年孔子生五代周顯德中魯守趙侯作新廟宋慶曆中嗣文宣公宗愿大建廟學有元至順三年衍聖公思晦請復尼山廟禮部尚書康王公夔白于中書至元二年左丞王公懋德議設尼山書院以彭璠爲山長三年冬十有一月庶訪僉事楊公文書訥分司至于兗州以璠言用前濟寧總管張公仁舉使同知滕州事郝君寶寶問董其役十有二月分司至于鄒揚公及郝君相役於尼山滕鄒大夫士來致貲購故魯武惠公宅於東平四年春正

月璠如東平二月東平總管王公主敬致材於白馬河三月壬子允工作大成殿大成門神厨作明倫堂東齋西齋東塾西塾作毓聖侯廟作觀川亭秋八月告成宣慰使蒙古公羅括懸政治之書于門五年春二月庶訪僉事趙公天綱懸教法之書于堂夏四月郝君如沛以湖北庶訪使任公澤善書命繹曾文于碑其辭曰嗣聖至元皇帝欽天崇聖左武右文百廢畢舉衍聖公曰惟鄒東六十里五峯攸峙中惟尼山其神曰毓聖侯顏母之所於禱也東嶮曰坤靈之洞聖人石像在其中東有文

德之林蓋曰顏回之墓又東爲顏母之山有谷焉
其棘惟喬顏母之所由陞也者谷焉其棘惟蓂顏
母之所由降也前惟智源之溪後惟中和之壑其
在宋氏我先人文宣公爰作新宮既燬于兵惟今
泰寧禮亦宜之康里公曰惟天啓迪我人大明中
德萬世無疆惟休篤生聖人取于尼山奈何弗敬
崇厥攸居時則有闕里之廟奠厥攸宗時則有泗
上之林報本反始肩弗祠于尼山君君臣臣胎于
尼山於念哉左丞公曰俞張公曰我昔尹茲東魯
我乃大闕里清廟我乃新曲阜泮宮我乃飾泗上

林聊疆于齊我弗克事茲尼山滕大夫郝子材公
其任之揚公曰俞揚公曰嗟我憲史翟迪趙士恒
郭敏其道予言曰俾爾滕侯李考博汝惟長左而
猷之大夫寶寶問汝惟貳咸曰汝材作而行之揚
公曰嗟爾大夫寶寶問剪荆棘除埃壤以底厥舊
惟汝功選吏士庀工徒固基宇嚴廟貌惟汝任弗
疲民弗淹時弗糜財惟汝能我聞曰材惟舊易於
新力於舟易於車惟汝其念之郝君曰郝君曰
嗟爾鄒尹張士謙悉乃心以致役事以峙饌糧以
集車牛以利噐用鄒尹呂克中爾惟克勤其相鳩

材鄒士馬亨李儼李元彬考制度以底法鄒士王
從義其司入州史石居仁其司出鄒史吳守中胡
德秀其司程必謹必節毋致怠忽東平公曰昔在
魯共王壞聖人宅周廣厥宮乃今以魯公宅爰作
聖宇於乎休哉惟茲宇在宋于汴惟鄭恩宅在元
于鄆惟嚴實宅今茲歲在戊寅予其撤有文在杭
曰戊年破於乎徵哉今予致汝材毋撓材毋黷民
敬之哉羅括公曰惟天生聖惟皇崇聖孰敢不欽
若官若吏若士敢有不祗厥事國則有常刑敢有
朋醜酒致鄭聲博奕笑嘖以黷清廟時則有大罰

敢有譎使介舍羈旅國則有常罰敢有踰垣墻毀
宮廟牧牛羊竊薪芻時則有常刑趙公曰惟天生
聖惟聖垂憲惟師典教惟士祇學報本于茲有翼
有嚴若師若士非經何教非德何學一乃心勅乃
身以明天倫以究人治報天尊聖以衍無疆之休
或敢不恭則有常憲任公曰粵惟尼山在防鄆之
間孔氏自宋之魯防叔居防厥墓營焉叔梁宰鄆
五父爰殯防惟西北鄆惟其西南稽諸太史尼丘
之禱用名若字於是為信昔在宋氏宏大厥宇以
媿闕里洪惟有元式新大之惟有無疆之休必有

無疆之聞託之金石伯敷甫其作銘陳繹魯拜手
稽首固辭乃言曰惟天惟地惟載神氣神氣之合
其大無外其小無內昆侖旁礴會于岱宗南融臆
山太昊開天東迤尼山聖集大成支流于嶧是生
亞聖終始道統咸疆于鄒於乎盛哉邇昔聖人作
法一代惟吾夫子垂憲萬世亘宇綿宙罔不尊親
於乎大哉其在祀典惟有道德祭于瞽宗惟山川
出雲雨爰潤萬物時則旅之矧惟聖人澤被萬世
毓茲尼山新大廟宮於乎時哉乃作銘詩六章章
八句辭曰

昔在高辛有娥方將爰禱高禋玄鳥致祥立我商
人篤生玄王乃明人倫敷教虞唐 降茲有周頌
字鄒人尼山是祈夢維紱麟篤生素王乃聖乃神
敷教萬世誕明天倫 岱宗綿延尼山之蜿坤靈
是竅有吁其顛降神毓聖厥功竟天何千萬年不
崩不騫 乃剔故蹤乃作新宮持材自鄒輦石于
東庶士子來不日其攻聿飛斯翬聿見斯龍 新
宮既作尼山嶽嶽闕里泗林鴻光昭灼于衿青青
于何其樂于何其樂爾效爾學 尼山有祀鄒田
有芑胡不作人樂只君子樂只君子爲天子使於

萬斯年錫爾純祉

至元五年歲在己卯五月吉日國子助教陳繹曾
撰

祀曲阜宣聖廟記

至元五年三月監察御史言曲阜縣宣聖廟繕完
訖功國家宜錫楮幣樹碑石勅儒臣製文辭紀歎
崇之蹟於久遠具疏以聞制可賜中統二萬五千
緡爲立碑之資七月又言宣聖五十四代孫思立
今任監察御史請特賜香酒翰林撰祝文命思立
馳驛致祭以成其事斯文章甚時天子北幸上京

移文分臺章奏復可其請遂署檄下山東道以
奉照爲庶訪司所按臨分司所巡歷居則總督至
則必祭庶體敬共之意八月二十三日思立行祭
禮山東庶訪副使伯嘉問亞之同知濟寧路事衆
家奴終之猗歟休哉實熙朝之盛典也惟吾夫子
以天縱之聖出神明之胄雖不位乎君師脩道立
教如天地日月然詔後世而垂無窮者大矣或以
謂則象乾坤爲漢制作不亦陋乎况鄉邑其所生
子孫其所承敬慕之者宜何如哉我國家將以振
厲風教扶植綱常立人道之極表文治之盛孰不

觀感于茲謹識其事如右俾來者有徵
至元後已卯歲秋吉中議大夫御史臺都事太原
王守誠記

釋奠宣聖廟記

皇帝總宏綱新文治任賢使能發政施仁率繇成
憲迺至元六年青龍庚辰夏五月辛上都百官分
署以從七月庚申太師中書右丞相監脩國史知
經筵事臣馬扎兒台中書平章政事知經筵事臣
寺羅臣汪家奴臣沙臘班中書參知政事知經筵
事臣阿魯參議中書省事兼經筵參贊官臣字羅

臣何廷蘭中書左司員外郎兼經筵參贊官臣倍良
哈合左司都事兼經筵參贊官臣蠻子臣孔思立
右司都事兼經筵參贊官臣蠻子等奏言曲阜林
廟宣聖所生之地非他廟學比今議遣翰林脩撰
臣周伯琦馳驛奉香酒釋奠仲秋上丁甚稱崇報
之意臣謹以聞制可越四日癸亥上御龍光殿

太府進香上手致敬太官出上尊四伯琦欽承以
行八月乙酉至曲阜縣明日奉香酒至宣聖廟又
明日丁亥祠用太牢奏大成樂行三獻禮伯琦初
獻同知濟寧路事衆家奴亞獻兗州知州馬從義

終獻皆冠進賢冠被法服時宣聖五十五代孫曲阜縣尹克欽主祀事適秋亢旱省牲之夕陰雲四合甘澤沛若將事之晨天氣清朗月星明晞俎登豆列禮備樂和祝官致告執事具虔薦裸興頌悉中儀式竣事合孔顏孟三氏宗族師弟子員暨郡邑官僚燕于東室咸北向載拜序飲上尊酒盡歡而罷竊惟吾夫子之道悠久無疆與天地同大日月並明故覆載無所不至照臨無所不及雖生不逢辰用不得位然明六藝作春秋以傳道統以建極使彝倫敘品物亨政教明千萬世如一日者

考必以建學立師爲先大用其道則大治小用其道則小康具在方策粲然可考惟闕里爲聖人鄉國光嶽之靈冲和攸萃廟貌赫墓在焉宗姓支裔守焉歷代報德報功之慎且重也宜矣皇元自受命以來廣黌舍崇教育世封其大宗爲衍聖公以奉祀事世任其小宗爲曲阜尹以治其地置守廟戶復其家世祖成宗重勅廟宮武宗加號大成仁廟以來即位必遣使祭告厚有錫頒今上皇帝踐祚八年之中凡四遣使始命文臣以即位告又

命五十四代孫監察御史思立致祭以樹碑告且
頒中統鈔二萬五千貫爲樹碑之費而去年春及
今年秋又雨致香酒釋奠上丁其欽崇美報之典
於斯爲盛洙泗之間歲承天寵薄海內外咸知所
向夫子之道將大用於今日聖君賢相都俞吁咈
登三邁五黎民於變時雍顧不在茲乎猗歟隆哉
伯琦弱冠嘗侍先君謁拜二十有三年矣乃今獲
奉德音誕舉盛典何幸如之謹志其歲月以刻諸
廟門之石

至元六年八月望日翰林脩撰承務郎同知制誥

黃國史院編修官鄧陽周伯琦記并書篆

尼山書院記

尼山書院山長臨川金谿彭璠歸自魯以興復書
院始末爲言乃爲之次第其事云尼山去曲阜東
南六十里今屬滕州鄒縣在滕西百里鄒東六十
里其山五峯西峙中峯則所謂尼山啓聖王夫人
顏氏所禱而生聖入者也山皆石其巔多蒼栢諸
小木皆巨葉霜露既降絢如渥丹升降各途升之
谷草木之葉皆上起降之谷草木之葉皆下垂無
或交戾反刺者其東崖有石洞曰坤靈之洞中有

聖人石像臨水與顏母山對其北則防山即聖人
合葬其父母處也今書院在其中前有智源之溪
後有中和之壑往者奉尼山之神而祀曰毓聖侯
其左有夫子之宮焉故宋慶曆癸未孔子四十六
代孫襲文宣公知兗州仙源縣示愿作新宮廟有
夫子之殿有夫人之位有講堂有學舍有祭田自
是歷宋金至于今蓋三百餘年矣宮不知何年廢
我國家查有中夏尚崇孔子之造歲月寢久典禮
斯備至順二年歲壬申五十四代孫襲封衍聖公
思晦用林廟管勾商言理言請復尼山祠廟置官

師奉祠因薦璠可用事聞中書送禮部議奎章閣
大學士康理公變時爲尚書力言其事當行議上
至元二年丙子中書左丞王公懋德率同列執政
者白丞相置尼山書院以璠爲山長三年六月至
官祓舍山中罄竭私橐繼以假貸具羊豕爲酒告
山之神召近鄉父老受神賜告以興廢之故明日
鄉父老各以其人至遂除荆棘撤瓦礫得殿及門
之故基諸舍之所在次第而見將告諸郡縣而經
營之山東東西道肅政廉訪分司寧夏楊公文書
訥行部率其吏翟趙郭趨茲山留璠舍一日顧瞻

徘徊以其事爲已任命同知滕州事郝寶寶問領
之首出俸以爲之先而監州李彥博鄒縣令張士
謙與郡邑之官屬暨大宗子孔克堅襲曲阜令克
欽宗族子孫凡齊魯之境賢卿大夫士民之好事
者大出錢而勤成之擇木於山陶甕於野備饒致
遠牽車牛服力役連畛載途飲餉相望役大而民
不知勞又得古殿遺構之成材於魯之故家尤稱
巨麗不數月而大殿成殿門成毓聖侯之祠成學
宮在廟之西倣國子監制也作觀川亭於坤靈洞
之上相傳夫子之在川上蓋在此云繼以聖給聖

賢之像成樂器祭器以次第成置弟子員以凡民
之子弟俊秀者充之皆復其身役廼以明年之上
丁用太牢致祠告成噫其功可謂敏矣夫朝廷定
議於上部使者有司宣力於下以克有成聖明在
上文運宣通於斯可徵焉嗚呼古初開物天作茲
山太和絪縕元氣融結流形降神篤生大聖以立
三極位天地育萬物與日月四時貫通於無窮若
夫且徠龜蒙至於岱宗雨露風霆往作來復前詹
後際邈然高深詎可或運會有時革奠新宇不
日而成豈偶然與瑞也得以聖宮從事於茲日可

謂榮矣集... 若夫播爲曆詩歌功德式爲明享勒之金石則
有待於當今儒林之君子也哉

至正二年壬午正月上元日奎章閣侍讀學士通
奉大夫知制誥兼脩國史知經筵事蜀郡虞集撰
致奠曲阜孔子廟碑

有元至正二年十月壬戌皇帝御咸寧殿勅中書
具奩鄉朋酒命集賢直學士臣郭孝基乘駟致奠
于曲阜先聖大成至聖文宣王之廟中書助祭元
寶二千五百緡嗣行聖公臣克堅爰擇十二月丁

巳之吉釋奠如章禮成臣等拜手稽首謹言
皇帝欽崇聖教建宣文之閣崇文之監日御經筵
講德唐虞辨章二代日夕乾乾遜志時敏式惟先
聖孔子昭垂六籍丕覺萬世惟聖知聖是用啓自
天衷特致殊禮希世盛德其可泯而弗宣刻之金
石光示永久禮寔宜之臣等基聞聖人之道執一
常御萬變君君臣臣父子子大綱一正萬目畢
舉故曰王者中心無爲以守至正人心服於下天
理應於上樹之風聲東以禮義不動聲色靡然於
變協風時雨諸福之物罔不畢至漢祖致祠天下

歸心唐宋升祀永錫胤祚用此道也皇帝天縱玄
德加以聖學垂衣論道天下泰寧心悅神孚獨得
淵衷有非臣下所能窺測者小臣載筆敬用作銘
銘曰

皇帝若曰惟天惟聖揭乾之明握坤以正惟禮惟
樂惟刑惟政文以經緯武以戡定立我邦家功斯
爲盛皇帝若曰宣文在中乃瀦辟雍乃流泮宮有
庠有序八表攸同巍巍素王邊豆鼓鐘於論曲阜
曷不加隆皇帝若曰有典有則春秋上丁庚子之
吉四饗厥家常祀不忒誕昭予敬致奠惟特予鄉

予酒于聖之宅皇帝若曰予嗣歷服惴惴小心如
臨于谷君君臣臣惟聖予福于時處處敢忘嘉告
聖經是式我祀匪黷皇帝若曰予聖時欽惟汝臣
鄰惟汝士林汝子汝孫士庶時忱服聖之言精白
爾心勸相子家爾玉爾金

集賢直學士中奉大夫臣郭孝基撰

代祀記

至正八年秋七月二十日上御灤京之水晶殿右
丞相臣朵兒只左丞相臣太平平章臣教化叅政
臣孔思立奏宜遣宣文閣授經郎臣董立以香酒

乾羊致祭于曲阜孔子廟制曰可乃手香加額致
敬又之以授思立出宣旨命臣立涓日而行爰以
二十八日發程次日二十二日至止闕里二十三
日展敬林墓二十四日具儀二十五日臣立爲初
獻行聖公孔克堅爲亞獻守臣濟寧路總管呂魯
爲終獻知兗州臣劉思誠等備分奠丑初將事寅
末而畢遂會孔氏族黨饗胙于齋宮與坐者五十
餘人衣冠威儀抑抑濟濟足以感懾人心禮成衍
聖公言使者奉天子明命禮于先聖宜有紀以示
後臣立伏惟夫子之道高明博厚與天地偕世之

三綱正而九法敘皆其功德之福斯民也凡有
下國家者不容後其報我朝列聖相承右文興化
尊崇夫子度越前代殊思優典固已載于信史壽
之金石迨于皇上躬行仁義以爲民極日御經筵
緝熙聖學宰相文臣又能啓沃以斯道之正其發
命遣使夫豈徒然蓋亦答神之貺祈神之祐庶世
運于唐虞三代之隆也然則凡爲孔氏之後與夫
與祭執事于廟者可不體承聖君賢相之美意以
沐浴聖化哉臣立敢拜手稽首以是文諸石
至正八年八月二十九日宣文閣授經郎臣董立

撰

尼山大成殿四公配享記

今皇帝至元三年重建尼山書院奎章閣侍書大學士虞公集寔記之未及大完而山長彭璠卒後十有七年鄒縣達魯花赤馬哈麻君增塑顏曾思孟四公配享殿中邑士趙守寬李之質因其同里陝西等處行中書省左右司郎中張君思政來京師屬素爲之述按顏子之侑坐肇於唐太宗貞觀二年冬尚書左僕射房玄齡國子博士朱子奢之所建議也宋神宗元豐七年夏復增孟子侑坐禮

者肅敬蓋啓聖王與夫人顏氏嚮于是山神秀所鐘篤生聖哲繼天測靈萬世永賴所以紹斯道之傳發微言之秘四公之功終古如一日矣書院之諸生尚考求於方策非四公之學不敢學也邑大夫之望於諸生者庶其在此可不勉哉

至正十又四年歲在甲午三月戊寅國子監丞危素記

勅加封啓聖王碑

維至正八年四月上在興聖宮御宣文閣中書右丞相臣朶兒只等入奏曰孔子父叔梁紇加封啓

聖王未有刊述昭示久遠謂以中書左丞相臣呂
思誠爲文出中統鈔五千貫下襲封府具攻石之
用制若曰可臣思誠奉命惶悚大恐弗任乃拜手
賜言曰惟我國家崇重聖德宣昭聖道與王化合
并太祖皇帝肇基洪業太宗皇帝在潛行釋奠禮
祀孔子於日月山世祖龍飛車書混一自上都大
都及天下郡邑立廟學曲阜林廟尤加脩崇於是
定襲封之嗣餘孔氏一人尹曲阜縣恩至渥也成
宗皇帝廟於國子監武宗皇帝加謚大成於至聖
文宣王上仁宗皇帝詔立碑大曆初制加於啓聖

部郎中林希之所奏請也度宗咸淳三年春增升
曾子子思逮我朝混一四海且四十年楚祐三年
仁宗皇帝在位崇學右文御史中丞趙公世延始
言南北祭禮不宜有異當并曾思如典故制曰可
先是四公列坐兩旁禮部以爲翼承道統述明聖
經作則萬世以立人極論德定名列次配侑東坐
西鄉於禮爲稱至順二年進封顏爲復聖公曾爲
宗聖公思爲述聖公孟爲亞聖公仍命詞臣爲制
書一代之典可謂備矣馬哈麻君作邑於聖賢之
邦欽承上意克脩墜典其爲政知所先後從可知

矣禮曰有其舉之莫敢廢也君其知禮者哉雖然
君之爲是舉蓋有難者方盜據徐方力抗王師鄒
之爲縣密邇斯境朝廷憂其供給之繁增設邑長
以君才敏而擢用之軍旅繹騷君應答靡有凝滯
將士感悅及徐平撫安疲忙飛芻輓粟徭役平允
當此之時又能汲汲焉以興學明教爲務是以謂
之難也今年春君以仲丁歲祀致齋之夕夢升禮
殿瞻仰聖師行事之際迺睹配享未備惘然久之
首出俸錢爲之倡僚吏士民相率來助邑士張敬
祖主其出納曾未數月而工告畢公德容粹溫觀

王頴氏曰啓聖王夫人曠典也今襲封衍聖公克
堅既追官中奉大夫階二品換印章爲銀爲啓聖
王碑得請聖眷隆厚局以報稱臣謹按春秋公羊
氏穀梁氏依經書孔子生左氏隨經書孔子卒史
記作殷本紀帝嚳妃簡狄生契十三遷而至天乙
始有天下是爲成湯書契者原其初也微子開國
亦曰帝乙之長子明其本也孔子世家曰其先宋
人曰防叔生伯夏言有承也又書鯉以下直至漢
時復列傳諸弟子七十二人宋儒邵雍曰天子以
四海爲家孔子以萬世爲家殆以是夫惟文公朱

熹剛定世家序論語前曰魯襄公二十二年冬十一月庚子父叔梁紇母顏氏生孔子於魯昌平鄉陬邑又曰孔子生鯉字伯魚鯉生伋字子思作中庸厥有旨哉夫惟玄鳥之降玉筐之覆金行啓運斗光垂精爲五百年之昌期千萬世之嘉會者寔由天生顏淵曰仰之彌高鑽之彌堅瞻之在前忽焉在後子貢曰立之斯立道之斯行綏之斯來動之斯和其生也榮其死也哀子思曰仲尼祖述堯舜憲章文武上律天時下襲水土孟軻曰自生民以來未有盛於孔子者也賢於堯舜遠矣太史公

曰自天子王侯言六藝者析中於夫子可謂至聖矣揚雄曰天之道不在仲尼乎王文中子曰大哉乎君君臣臣父父子子兄弟夫婦夫婦夫子之力也其與太極合德神道並行乎韓愈曰社稷以功夫子以德程子謂賢於堯舜者以事功蓋金聲玉振集群聖之大成寔由天縱若夫尼山請禱精誠昭揭而其表相殊異曰似堯曰似湯曰似禹曰似子產曰河目海口黃帝之形貌也曰脩肱而龜背成湯之容體也惟此身體髮膚之所從毓聖誕聖之所自不在茲乎漢時聖舅顏氏居魯親里



原件短缺

聖妃并官氏居安樂里復其繇發宋時有齊國公
之封又有魯國太夫人鄆國夫人之號其爵邑又
若不自其子者今茲峻其徽章名與情稱百世不
能改也於戲盛哉伏惟聖人人倫之至也繫周易
剛詩書定禮樂垂憲萬世師表百王者茂有加矣
獨於春秋曰志在焉孝經曰行在焉春秋天子之
事也三綱九法望於周也故曰如有用我者吾其
爲東周乎孝經開五孝之用自天子至於庶人各
有終始其曰至德要道其曰天經地義其尊親之
心顯親之念曾子所謂一貫孟子所謂一本也不

然是謂悖德悖禮矣洪惟今上皇帝接太祖皇帝
世祖皇帝之聖緒嗣守列聖以來之成規聖治之
敷孝治之洽所謂通于神明光于四海者於春秋
孝經有嘉焉碑之闕里光昭休烈於無窮若江漢
之濯秋陽之暴皞皞乎不可尚也臣思誠頓首誠
惶誠恐復獻頌曰

於鑠皇元赫赫明明翕闢乾坤資始資生太祖肇
基風霆流行世祖混一履載生成列聖嗣服時靡
有爭今上繼緒品式法程聖治丕顯孝治丕平嘉
崇孔子縉典鴻名尼山有禱斗光垂精表相之異

至道之疑曰惟天縱玉振金聲孰與道生本立枝
承王爵之崇啓聖之榮義符於情名與實徵五父
之殯緩手其行防墓之崩泫然涕零志在春秋行
在孝經愛親敬長春秋權衡尊親顯親五孝重輕
今茲有茲誕聖毓霧子孫有行是服是膺尼山崢
嶸泗水不盈蔚彼孔林卓彼魯庭有豐斯碑光昭
日星同我夫子無忝所生闡我皇風四海永清
至正十四年夏四月中書左丞相呂思誠撰

代祀闕里記

皇上即位之三十二年秋七月命皇太子撫軍冀

寧以少保中書平章擴廓帖木爾總諸軍熙庶務
依前便宜行事威懷遠洽夷夏安寧明十二月以
皇太子旨遣官持祭先聖闕里中書檄濟寧省預
卜純薦牛一羊二豕二越六日青宮手祝奩薌爨
之授元禮出涓日而行以二十四日至魯城祀前
一日省牲噐視條濯翼日癸丑丑初肅事于廟禮
備三獻牲腊酒冽登降有數質明竣事以神餽享
孔氏族人于熈申堂衍聖公謂禮有可徵者祭祀
之謂也宜具歲月于石元禮謹惟聖人之道與天
地並行有天下國家者所當崇重春秋脩事祖庭

累朝之盛舉也今我儲皇仁孝之誠昭假上下雖
金輅行在六師駐嚴而脩明典禮不廢俎豆之事
其尊崇聖教增輝昭代示人心以為治之本宏規
遠略猗歟盛哉是可書也若曰底定我家仰祈鴻
休基圖永命祚于無窮神之相之厥惟禎矣是重
可書也拜手稽首謹為之記

至正二十五年二月吉日承德郎樞密院經歷賜
進士及第魏元禮撰

此卷弘幹按碑訂一百三十一字增一百八十

四字騰通三行補遺一篇刪十二字

